

القطر في الورقة مسدود

مطبوعات الفجر 21

الدنيا جاية

شعر
د. فاطمة الحفنى

٢٠٠٣

مطبوعات الفجر
تصدر عن جماعة الفجر الأدبية بالقاهرة
المشرف على التحرير

دكتور يسرى العزب
المراسلات باسم : المشرف على التحرير
الجيزة - أرض اللواء - فيصل

١١ ش محمد منصور

تليفاكس : ٣٤٣٢٠٧٥

٥٧٠٢٢٤٢

المحتوى

٤٥	لأصلنا ح نعود	٥	الاهداء
٤٩	آه يا جدى	٧	صباح الحب
٥٥	أنا وياك	١٣	قلب طيب
٦١	الخروسة	١٧	عودة
٦٣	عيل عجوز	١٩	النبله
٧١	أنا الصورة	٢٥	رحنا أو جينا
٧٥	صحيح إنسان	٢٧	الحب نساقي
٧٩	عنا قيد عنب	٢٩	الدنيا جاية
٨٥	الشمس قالت	٣١	الحرف والمعنى
٩١	التوهة	٣٥	الميزان اختل
٩٥	مخى خرج	٣٧	العاشق الفنان
١٠١	مين اللى راح يقرأ الكلام	٣٩	آه يا وطن
١٠٥	صدر للشاعرة	٤٣	فوق الاحتمال



الإهداء

إلى وطني ...
منه أتيت ...
وإليه أعود .

فاطمة الحفنى

صباح الحب

صباح الحب..
يا أجمل نهار عندي
صباح الفل ...
يا دمة فرح على خدي
صباح الخير ...
يا عشي اللي على قدي
صباح م القلب يا نبضة..
وعاشت عمرها تدي


صباح الخير..
يا أول طير ..
يزقزق في ربيع قلبي
صباح نادي وموج هادي
عليه أحلامنا بتعدي
صباح القشطة ..
يا خير الحليب أبيض
يا ريحة الخضرة في بلدي
صباح وسماح ..
ودنيا براح ...
ونسمة عشانا بتهدي
صباح أبيض على عيونك
ودعوة ربنا يصونك
يا حبي يا كل ما عندي.

افتح دراماتك

راح اكسر كل قيودي
وأعدي بحبي حدودي
أهرب من كل العالم
والقاني معاك يا وجودي
يا حبيبي افتح دراعاتك
قرب .. وسع خطواتك
قابلني وانا جايه لك
خُذْ مني دانا شايلاك

إخلاص ما عرفش حدود
وغرام فى الكون محدود
جاية لك وانا محتاجة
لكنى ف ضعفى قوية
محتاجة اليك يا حبيبي
هو انت ما محتاج ليه
سامع يا حبيبي أيامي؟!
وجميع أحاسيسي معاها
بتدعي وانا وياها
للحب يعيش ويانا
متصان دفيان بدفانا
للهى يطرح جوانا
بساتين وربيع وخضار

ويديم أوقاتنا عمار
ويحلي الدنيا قصادنا
تقطف خيرها وتديننا





قلب طيب

حبيبي يا قلب طيب
عمران بالخير تملئ
يشرق بالخير يخلي
أوقات الدنيا تحلى
ولونها يبقى أحلى
تلبس فستان وطرحه
مغزولة بشوق وفرحة
تلاقي الدنيا لونها

وتتكحل عيونها
ومع رَمْشَة جفونها
..تلاقي الناس أحبة
وان لمحت حُب نبت
ترعاه ...
وحبة حبة
يدفى نهاره بنورها
وينعس بين جفونها
مولود قلبك بينبض
.. بالحب وبالحنان
يتعلم هو منك ...
تسقيه ويقول كمان
ويبقى نسمة ناعمة
... وندنة كمان

تحلو الدنيا أكثر
يفرح يضحك يكركر
الكون يضحك معاه
وتبقى كل لحظة
فيك دايمة .. في هواه.



مودة

بعد التوهة وطول الغربة
رجعت لقيت
نفس شارعنا زي ما هو
وبرضه البيت
لكن شكل البيت من جوه
فتهيألي ما بقاش هو
شفت الغربه وجوه ف بيتي
اللي أنا عشته وعاش حواديتي

بابي سريري وحتى الحيط
والكرسي اللي عليه أنا ياما
قعدت سهرت كتبت قرئت
حتي ملامحي .. جوه مرايتي
حست غربة وشافت فيها
استغراب باين في عنيتها
دي مرايتي اللي كت بتغني
لما بحب تقرب مني ...
جيت ألاغيها لقيتها قزاز
اللي لقيتها ما اتغيرش
زي ما كان من قبل ما أمشي
صورة ابوي إلى أخذني
حُضنه وهو في البرواز.

النبلة

ماشي الولد ...

والنبلة في ايده اليمين

وجده بيتتم كلام ويقول:

... آمين

لسه حيرمي..جده قال:

عيب يا ولد

سهّ الولد جده ورمي..

النبلة تكسر لوح إزاز

رفعت ستار ...
زالت جدار ...
بان للولد دنيا وفيها ألف لون
أشكال كتير..
بشـر ..
وشوش ..
عيون بلا نني ورتوش
فيه ناس بتتدارى خجل
وناس كتير ما بيختشوش
جنية ليها ألف "تدى"
وألف طفل بيرضعوا
بنية مصلوبة على جزع الشرف
وشهيد على كرسى النهاية بيعترف
مستور وناس بيقلعوه

ولما مات ... بيكفنه
ودموع كتير
من غير عيون
نازلة على خد القدر
وشاف كمان
واحد إمام ...
بيكر عديّة ياسين
والفتحة وقصار السور
وهناك بعيد
حرمة جبل ...
راجل جبل ...
بعد المخاض كان الولد
هيكل عظام ..
من غير نخاع

والجمجمة ...

ما فيهاش إلا جوز عيون

بيدمعوا ولا بيشفوفوش

ولسان طويل..

أخرس تمام..

ولو نطق..

راح ينقطع

سيوف على رقاب العباد

وحريقة في كل البلاد

وجثث كثير متبعثرين

ماتت وعاش فيها الأنين

وفي اللهب ...

عيون كثير...

بتبص له

ومسك في جده بالقوي

قال للولد:

وأديك عرفت..

هي الحياة فى عصركم

وبصحيح..

23



رُحْنَا أَوْ جِينَا

ليه كل ما نقرب..

أقدارنا تبعدنا

بنتوه ونتغرب..

وينطفي عيدنا

نبص للأقدار..

وتبص في عنينا

تنزل دموع العين..

ع الخد تكوينا

وتقول على الفرقة..

قلوبنا مش قادرين

والهجر مهما طال..

الحب مالينا

دايب في أنحاءنا..

وف كل مالينا

وقلوبنا بيه عايشين..

رُحنا أو جينا.

العُجْبُ نَسَانِي

قوم يا حبيب العمر

ويا الله من تاني

رَوْقٌ وفوق خلي

الهم ينسـاني

دَ انا يوم ما حبيتك

الحب خلاني ..

أنسى اللى فات كله

وأقول له يا زماني

تعالى نتصالح
و اخذك في أحضاني
يا زمان د انا حبيت
... والحب نساني
كل اللي قاسيته
منك وناداني ...
ولقيت إني بيه
مولودة ..
ومن تاني .

الدنيا جاية

حاسة إنك معاي
وان انا وياك
وكل يوم في ميعادك
يا فرحي باستناك
ورغم سنين بعادك
يا حبيبي انا حاساك
إنت مكاني وزماني
سكني وفيك أمانى

باشوفك دنيا جايلة
شمس بتشرق علي
طير فارد لي جناحاته
لاجل يضل علي
ألقاك في عيون عفية
بتشوف الدنيا بي
أحب الدنيا فيك
واعيش العمر بيك
واكمل بيك وليك
تبقي لي كل حاجة
في عمري مالك شريك.

الحرفه و المعنى

قلبي ينبض
يدفق الدم ف عروقي
لطرف صابعى ...
يترجمه قلبي لكلام
يترمى ع الصفحة
تاخذه ف حضنها
غالي عليها.. ابنها
مولود جديد

من غير رتوش
في الزيف مالوش
جنين وكان...
دلوقتي بان...
ع الصفحة طالع للحياة
عفي ف عز الشباب
فاتح لها ١٠٠ ألف باب
على الجنين ..
والعجوز..
وقلوب والشباب
مولود فصيح..
واضح صريح
و صدقه كله خير
يدخل قلوب الغير

ينطبع جوة القلوب

و يدوب

ماينمحيش

فى العقل معنى

ما ينتسـيش

مع الخيال..

يطلع لفوق

جناحات بریش

ويعـيش

مهما يدي...ما ينتهيش.



الميزان اختل

ويفضل الحلم الجميل محبوس
يغمق لونه وينقلب لكابوس
يرعب ساعات الليل
ويرتعث قمره
ونجومه يغمى عليها
تترمي ع الأرض
وتلف وتدور بنا
إحنا بنى الإنسان

م اللف دُخنا...
والميزان اختل
عشنا وشفنا ...
العربي وزنه قل !!!

العاشق الفنان

كان المخاض بالليل
والفجر ولده الصبح
حافي القدم وبريء
لكن قوي وجريء
إنسان وعاشق فن
مسك القلم بحنان
ع الصفحة فكره بان
الحسن غار علشان

في كل أوراقه
الكلمة غصن البان
وحروفها تتمايل
شوق لبعضيها
...وهو يديها
منه كمان وكمان
م الشاعر الإنسان
العاشق الفنان.



آه يا وطن

آه يا وطن ...

يا نقش حفة فوق جبيني .. نن عيني

بسمتي .. ضحكتي .. بلسم أنيني

آه يا عيني ...

يا وطن مالهوش حدود

كل الوجود

فيه اتولدت وفيه رضعت

الحُب متعتق حنان

حُضن وأمان
فيه دفي قلبي الصُغير وارتوى
العمر بسنينه
وبشقاوة كل ما فيها حلاوة
داعب الأيام بحنية وهداوة
إتبعرت واتنورت
واتمخترت حواليه
بتتمايل وتتدلع عليه
نعست على حجره
حلم لها بعيني ...
أتاريها إيه !؟
أيام بتتشاقى وعامله نايمة
فاق الوطن م الحلم

لقى عيونها بتبص جوه عينيه
فرح بأيامه الوطن
وضمها ...

و قلبه كان بيدق
وكان دقه لها ...
ومنه عرفت قد إيه ...

هيّ غالية عليه
لضمت الأيام عقد فل
ولولي حر ...

ياقوت ودر

ولفت نفسها حواليه

تنوره وتزينه من راسه ولرجليه

تحرس شبابه وعافيته

وتقوته ...

أتارى ساعات الزما
عقاربها بتشاور عطينا
بتنادينا ...
واحنا مش سامعين
لأننا دايبين
وعيونها ترمش لنا ..
تغمز لنا ...
واحنا اللي مش شايفين
يمد إيدو الزمان بحنان
وبحكمة الزمن الكبير
يقول لها سيبيهم
دا أحلى ما فيهم
إنهم واحد
ومش إثنين.

فوق الإحتمال

بُعدي عنك
ألمه فوق الإحتمال
عمره ما ييقل ألمه
مهما زمن البعد طال
وجعه زي...
وجع الضرس لما...
يخلعوه
جزء حي سليم بقسوه

بيبتروه

زي إيه ؟؟

دا مألّهش زي

موتوه ..

وأهولسه حي

آه.. وآه.. وألف أي

آه يا نبضى ...

ياللى مبدور ع الطريق

ياللى ضد الموج بتسبح

فى الغريق

آه ياكلّى...

ياللى ماشى...

بلا طريق...

وبدون رفيق

لأصلنا ما نعود

يا صباح بيفرش نوره

فوق بلدي

هالل نهاره وجاي

من بدري

اديني ودنك

كلمه راح اقولها

بصدق والله

طالعہ من قلبي:

لو جيت لقيت بلدى

ماهوش هو

ونيلي شوفته

كأنه مش .. هو

والمصري برضه

شكله مش .. هو

إوعي يكون حكمك

على الظاهر

لازم يا صبح ..

تشوفنا من جوه

إحنا مازلنا يا صبح

زي زمان

مهما اختلفنا..

الشكل والألوان

جوانا عرق من الجدود

... ممدود

مارد حقيقى حر

.. ماله حدود

لكن الزمان يا صبح

... مال بينا

حاول يجمد عزما فينا

يهد حيلنا...

ويلوي أيادينا

ملنا وشلنا

واتلوى دراعنا

زادت حملنا...

برضه ما بعنا

تاه الطريق...

وإحنا لم ضعنا
ضاقت علينا
قلنا برضه ولو
لأبد تاني
لأصلنا حا نعود.



آه يا جدي


رحت مره ازور ..
اتنين من الشجر اليى كان
فى ارض جدي زمان
ارضه العفيه اليى كل
شبر فيها كان
الزرع فيه بستان
الخير كتيـر ..
والناس كتيـر ..

اولادها عناقيد عنب
يتجوزوا ويكثروا ...
عيال قلوبها غيطان
الزرع فيها خضار
والحب فيها عمار
ممدوده بلا عناوين
... وأهلها الحلويين
.. لا يفكروا دالعين
ولا يقسموا الأراضي
.. قراريط ولا فدادين
ويفرقوها ليه ؟!
ويفتتوها ليه ؟!
ما هي قويه بوصلها
وهم عاشوا ف ضلها

.. الجفن مرخي بارتياح
على نني يحلم فى المسا
ويصحى مع نور الصباح
يلقى اللقم متغمسه..
بالحب والزاد الحلال
ويبص علي كل العيال
في عيونها ...
نظرات الرضا
... متجدده
وهدومها م القطن الأصيل
... والنيل
و سحابات المطر تشتي
يصحى جوف الأرض
تنتعش وتفور

تفرد عيونها نور
يتوضا بالميه الطهور
وتقوم تسبح ربها
... مع زرعها
وكل ما فيها..
فوق شجرها..
وف سماها..
من طيور
ياااه يا جدي:
يا اصل متعتق حنان
.... حُضن وأمان
... والله زمان
ومهما ح يطول الزمان
أو.. يتوّه شكل المكان

... مهما ياخذوني بعيد
يلبسوني توب جديد
نقش بصماتك في عمري
... اللي جاي واللي فات
عمري ما ح اكون إلا إنت
... في الأصالة والصفات
دا انت بصماتك في عمري
... اللي جاي واللي فات .



أنا وياك

يا طفلي يا اللي متدلع
ومتربي على يدي
بحاجبك لما تتشاقى ...
وأنا ضاماك
ونظرة في جمال عينك بتغمز لي
ونتبسم أنا وهي ونتعاهد ...
نخلينا كده ساكتين
كأنك ياسنين عمري ...

عرفت تداري

وتكمل...

وانا والنظرة مش عارفين

وبتسافر ...

لآخر الدنيا

ما يهمكش م السكة

ولا م الخلق

أنا وياك ...

و قلبي معاك ...

يحوم حواليك

ويدعي لك..

ودقاته كمان ترقبك

تحب ..

تعيش وتتهنى

ولما تمل أو تتعب

وترجع تانى ...

تلقاني ...

بكل حنانى باستناك

وعارفة دواك

رحيق الصدق في روعي

وفي حبي

وخوفي عليك

حيثيك

تقوى وينصلب عودك

وترجع تانى..

تملا بالهنا دنياك

لكن إوعى ياكل الناس

في يوم تجرح

ولو جرحوك..

ولا يهمك

دواك عندي

ما انا وطنك..

وانا أمك...

لو اتبعترت راح المك

تعود تاني ...

عشان الدنيا

وعشاني

كعقد من الهنا ملضوم

وليد ويادوب ...

بيتهز هز على حجري

وأمسح دمه بخدودي

..وأعزف له على عودي

تنام مبسوط..

وتحلم تلقى فى صباحك

جمال الحلم متحقق..

وليك موجود

تبدأ تانى خطواتك..

على أول طريق ممدود

مالوهش حدود

تمشي فيه

جرىء جداً

ومش خايف

عشان عارف

إن ف كل خطواتك...

أنا وياك.



المجروسة

حبيبتي يا مصر يا اللي
فاتحة صدرك تمللي
احضنيني يا الله خلي
غربتي تدوب جوه حضنك
والله يالاه مشتاقه لك
حالي حال كافة عيالكم
مشتاقين للضل فيكي

للدفا .. في حضن دارك

مشتاقين للعذب نيلك

يلما أخلى سلسيلك

نسمتك .. زرعك وخيرك

بسمتك .. في وش غورك

وق قلوبنا الحب صافي

خلى دق القلب دافي

زى موج الخير في نيلك

يروى خصبك تطرحي

ينتشى ويعشق أصيلك.

عيل مجوز

وهم لسه بيولدوه
قالوا دا راجل زي ابوه
أخذه الزمان من حُضن أمه
وقال: حاضمه
جوه أيامي وألامي واعلمه
كبر شويه ..
وبص لسنيين الزمان..
زاغت عينيه

لقى كل عمره اللي مضى
كان عايشه بيدور عليه
كترت سنينه ولفه طال
مالقاش يا عيني غير عيال
كبرت ...

ودار ...

فيها أم لكن للعيال
ما هو برضه عيل زيهم
ونفسه يدخل حُضنها
... وتضمه لما تضمهم

نفسه في يوم

يلاقيها بتطبطب عليه

تلعب في شعره ينام

تغمض له عينيه

ياااه

ياما نفسه جوه حجرها

ينعس قوي ...

يدفى قوي ...

ويبقى مطمّن قوي

يحلم وحلمه يطول ...

طول السنين ...

اتسرسبت من بين إيديه

وهو ... بيدور عليه

نفسه يلاقيه ...

عيل بيجري فى الغيطان

يرسم بقلمه ع الحيطان

يتشاقى يتعفرت يقّع..

ويقوم عشان

يتشاقى تانى وينبسط
لكنه فجأه ..
بيصحى من حلمه الجميل
و يلاقى نفسه كما هو..
راجل تمام ..
وله شنب ...
مطبوع على كل أيامه
وأحلامه كمان
جوه كتبه ... بين سطوره
في كل صورّه على الحيطان
... آه يا زمان
ليه بس كان حكمك علي أتولد
ناسي اني عيل ...
وابقى راجل بالقوي

أدارى ضعفي واحس بيه
وابان تملي انى قوي ؟!
وقبل ما يكمل سؤاله...
يلاقى حواليه..
أيادى ياما صغيرة
يشد برجوله الأيادى كلها
يطلع بها...
ويطير لفوق...
لفوق قوي ...
ويبص من فوق ع اللي تحت
يقول لهم:
نازل لكم...
حاطع بكم ..
على كتفي على راسى حا اشيل

أنا أصلى من يوم اتولدت
ممنوع أحس بمسـ تحيل
من يومها ركب لي الزمان
شئبي الكبير
وقال خلاص:
إنت راجل يا ولد
مسؤول عن الناس والبلد
وآهى السنين مرت وقالوا
انى عجوز..
والله د انا عيل ومحتاج بالقوي
حبة حنان ..
حبة دلع ..
محتاج لحضن يضمني
لقلب دقه يحسننى

يشوفنى من جوه تمام كما أنا
عيـل وحافى..
فوق خضار الأرض باجري
ما فيش قيود
وخطوتي ف قدمي بريئة صغيره
متعرفش الحدود
نفسي ومحتاج بالقوي
ضعفي بيان..
ويحس به..
القلب اللي مخلوق من حنان
يمد نبضه يضمني
يحضن طفولتي..يلمني
ويقول لي إوعى تستحي
من ضعف بان

ضعفك عظيم

قدرك يا واد

إنك تكون..

إنسان.



أنا والصورة

فات الوطن والبيت

وزرعه في الغيط
واللي بقي منه
صورته اللي فوق الحيط
أبص بحنيني ...
وأكلم الصورة
ألاقي في عيونها ...
النظرة مكسورة

بتقول هنا ف دمي
حُب الوطن والناس
وأهمهم أُمي ...
ياما جوه قلبي حنين
لأهلي وصحابي
وللجيران ييجوا
يدقوا على بابي
لحضن يساعيني
فى جنوني وصوابي
إشتقت لما امشي
أشوف وجوه سمرة
للشمس تلسعني

واسهر مع القمرة

احتجت لما ابكي

لحبيب يواسيني

لو مرة أتألم ...

يحس بأنيني

أديه أنا دايمًا

وهو يديني

ألاقيني بين أهلي

واحس بسنيني

أبص للصورة ..

وبحب ادللها

وامسح دموع عيني

أحسن تبللها

يا حنة من قلبي ..
أخذه زمانه وغاب
مهما الغياب طول

ومهما كات الاسباب
أنا قلبي مسستني
تفتح علي الباب
تلقى سنين عمري
بقى كلها أبواب
تفتحها وتعدى
وتلاقي همك داب.

صديق الإنسان

أمانة يا شمس لو جيتى وانا نائمة

تصحيني

ولو تلاقينى يوم باحلم

تسببيني

أنام واصحى وانا باحلم

يجوز الحلم يتحقق !!!

ويبقى الحلم وسع الكون

أضم ف قلبي كل الناس

أفتح للهوى ضلوعي
وملأ الصدر أتنفس
وأجري في البراح أجري
أروح في النوم ولا أصحى
... أقول عامية أو فصحي
وأتكلم بصوت عالي
واغنى غنوتى تلالي
أنط لفوق تطول إيدى
سحابة المسها فتمطر
أدوب وافرح وأتبعتر
في كل الكون على كيفى
واعيش أحلم وادوب أكثر
ألاقى .. إني حاضنة الكون
وهو ف حضنى نام في سكون

وزي تمام بدأ يحلم
ويمسك فرشته ويرسم
... نقول له كمان
يجينا الطيف بألوانه..
ويفرش فوق ليالينا...
بكل ما عنده من ألوان
وأضحك ضحكتي تلاي
تزغرد جوه قلب الكون
ويضحك برضه هو كمان
يبص ف قلبي ويقول له:
صحيح إنسان
وخليتني أعيش وياك
غلبني هواك
... و صرت ملاك.



عناقيد عنب

عناقيد عنب
متشعبة في التبعيات
زي العيال

جوه حضن الأمهات

عناقيد وبتبص بشقاوة
على الحلاوة
على ابن شيحة ونبيته
حلاله سكنه وعيلته

وف قلبه شايها

يلف ويجي لها
يلاقها قايده له قناديلها
ومحضرة خيرها
يميل بحبه وينتشي
على رن خلايلها
ينعس على حجرها
ترخي عليه شالها
وينام .. يقوم مرتاح
على لحن موالها
يضم وبحبها ...

خصبه اللي جاي منها

عياله وعيالها
تلات عيال حلوي

زى العنب عاشقى
حُب الحياة والناس
وحبهم إخلاص
لأهلهم طالعين
على ونبيلة جوزين
من الحمام وليقين
ع الشط مرتاحين
يتبادلوا حواديتهم
يروح شمال ويمين

ويقابله ناس ثانيين

ياما كثير نساوين
متلونة بفساتين

ألوان على البشرة
والشعر والحدين

يكتب كلام فيهم
وبقلمه يلاغيههم
قصيدة والا إثنين
لكنه ما يدوقش
إلا من الحلوين
اللى بكل الشوق
مهما يغيب قاعدين

مستنيين طلته

ويحضنوا رجعتة
تحت تكعيبته
اللى تشوفه تقيد ...

عناقيدها من طيبته
ويجي السمك على ضحكهم
نفسه ينط ف حضنهم

ما هو أصله من أهلهم
العشرة والحب الجميل
ربطت ما بينهم كلهم ...
الناس وعناقيد العنب
الشط والموج والنخيل
الفلوكة والخضار ...

وكل سمك النيل
الكل واحد أصيل
قاعد ببسنتنى ...
شمس الأصيل

وهى فاردة الخيوط
على خد موج النيل
وأم كلثوم تنسج
وتلالي بالمغنى الأصيل

وتقول :

شمس الأصيل يا نيل

ويميل علي على
عشرة العمر الطويل
و يقول:
إنت الأصيل يا جميل.

الشمس قالت

الشمس قالت للغروب:

سيبني هنا شوية

عايزة أملي عيوني

بجمال وحنية

فيه جوز حمام وليفين

في حُضن بنية

لمحت في حبهـم..


في القصد والنية

حلاوة من حلوها..
زاد الضياء في
وفرش على أرضي
والدنيا والمية
هنا يطير للسما..
و يرجع بحنية
جائب عصارة هنا..
يملا بها الغية
تهمس حماسة الوفا
وتصحى فلاحها
وتبص لعيونه
تلقاه بيفتحها
تبص فيها بشوق..
تفوق بها وتروق

وتدعي رب الكون..
يصونها ويصونه
يقول الغروب يا شمس
يا الله نروح اليوم
بكره الشروق جايبك
تقضى معاهم يوم
الشمس تتمنى ...
وتقول ياريت يا غروب
كنت أقدر استنى
دا حبههم يا غروب ...
من صدقه طمني
دا انا من زمان
يا زمان..
عمري ما شفت اتنين

في بعضهم دايبين
م العين و للشرابين
لو حد فيهم فرح ..
التاني قلبه يدق
الدقة زغروطة ..
والدنيا مبسوطة ..
م الفرحة قلبها دق
وان حد فيهم دمع
التاني فجأة القاه
حُضنه وخده جواه
بحنانه وبخلاياه
أتمنى يا غروبي ..
تسيبنى مع صدقهم
وأفضل هنا وياه

دا حب يا غروبي
عمري ما شفت له زي
فى أى كائن حي
طال انتظار القمر..
قال يا الله يا شمسي
ليه تحرمينى منهم!؟
عايز انور لهم ...
ونجومي حواليه
نتغذى من حبهم ...
ويزيد ضيانا بهم
يقولوا لنا ونقول لهم ...
أحلى ملاغية.



التوهة

فى وسط التوهة ...

والغربة واخذانا ودائرة تلف

تشيل وتحط مقاديرنا

ونتقابل مع غيرنا

لا لنا يد فى لقانا

... ولا حتى فى غربتنا

غربا ف دنيا عايشينها

... فى سكتنا وفى بيتنا

خلاص الغربة ربطتنا

تلف .. تاخذنا في ديلها

وعارفين إننا حتما ...

في يوم لزمأ حندمنها

وحتى بدون سلاسلها

حنمسك برضه في ديلها

... ولا نقدر نبذلها

بتفطمننا على الفرقة

بكل ما فيها من أوجاع

ومن حرقة

ومن علقم وطعمه المر

ولما البعد ياخذنا ...

سنينا تمر

ونتعود على طعمه

وحتى ان كان مالوش معنى

مالوش لا طعم ولا ريحة

سـنـنـه كـسـيـحـة وجريحة

أدينا برضه عايشـينـها

ما هيّ علينا مكتوبة

واحنا كمان ...

بنسـتـسـلم لدا كله

وتهنـا ويا أمانينا

بقى لون الربيع فينا

صفار باهت

لا طعمه فيه ولا ريحة

وكل حياتنا مُرجيحة

تطوحنا لفوق خالص ..

وتحدفنا ..

نطير في الجو أو نسقط
لا ندمع دمعة ولا نضحك
لكن ... نسكت

شفايفنا يتتحرك ...
لكن صوتنا ما هوش طالع
عيون مفتوحة ع الآخر
وقدامها ...
طريقنا طويل بلا آخر
تبص وهي مش شايقة !!
ويمكن ؟! محتمل ؟! جايز ؟!
تكون خايقة
تلاقينا ...

في يوم همست شفايفنا

.. ودمعنا

ونار الدمع تلسعنا

وتحفر في خدودنا بحور

ومية نار تفوقنا

نفوق إزاي ???

ولو فُقتنا ??

نلاقي كام جبل واقفين

على أنفاسنا كاتماها

وجوانا ...

كام كلمة حفرناها:

* ممنوع إننا نسكت .. وممنوع برضه

نتكلم

و ممنوع إننا نفرح .. وممنوع برضه نتألم

* وممنوع نصحى والا ننام

* ولا نجرؤ على الأحلام

وكل ما نملكه فيها ...

سلاسل فيها وبدونها

ربطنا قدرنا في ديلها

وجوانا سؤال شاطر

سكن في القلب والخاطر

قدر يهرب من المتبوع وم التابعين

ويسألنا:

هل احنا صحيح عايشين !!؟

مُخَي خراج

فجأه لقيت !!!
الخطوة في قدمي ...
بتدوس على قدمي
والطريق ...
ماشي يمين و شمال
والكل قال:
مش مهم ...
أصل اللي فوق بقى تحت

واللي ورا قدام
اتلخبط الكل وبقى

اللي راح ..
زي اللي جاي ..
وأهي كلها أيام
متكررة ..
متبعترة ..
أكوام كتير ..

كلها أكوام

وكام .. وكام .. وكام
من بشر

تاهوا وباشوا

وبقوا ما فيش
والدنيا لسه زحام

فيها اللي ضاع ...

واللي باع ...

واللي عايش ع الكلام

واللي ضيع حلمه

وبيدور عليه ..

مش لاقى غير أوهام

رسم له خطوة

يمشي يلقي

الكل واقف بانتظام

هس خالص ..

انتباه ..

تعظيم سلام

طابور طووووووويل

وخيال مقاته ف أوله

وف آخره واد عقلة صباع
ماسك حجر وبيزقله

و الحجر ...

أقوى من يد الصبي

مع إنه ناصح مش غبي !!!

خبط في راسي..

قبل ما يصيب الهدف

وراسي ...

ماليه العذاب..

فتح له باب !!!

مُخي خرج

نفسه يشوف إيه اللي جاري

بره حدود الجمجمة

فجأه لقيت ...

مُخي في لحظه طلع له شعر

و ف لحظه تانيه ..

شعره شاب

وبقيت أنا بجمجمة

فاضية ولكن

ليها باب

ومُخ بره شعره شاب

وف قلبي في عيوني ملامحي

ف دم جرحي ...

كل ألوان العذاب.



مين الي راج يقرأ الكلام ؟

فوق السطور..

واقف القلم

بطل كتابة من الأكم

بين السطور..

حروف كثير متبعثرين

فجأه وبدون إنهم

لقوا إنهم

مكتوبين

بصوا بعيون مجروحين

وسألوا القلم:

كنا عايشيين مستورين

فجأة وبسبك لقينا

رُحنا كلمات مكتوبين

واحد يشوفنا يقرانا

وغيره

يرمي أوراقنا

يمزعنا

يبعزقنا

...نحيا لكن مجروحين

متشردين

كلمات حروفها مدبوحين

ليه يا قلم..

شلت الغطا عن سترنا ؟

من غير ما حتى تقول لنا ؟

يا قلم صريح ...

يكتب الكلمة بحقيقه وبحماس

خليق فصيح ...

وقبل ما تبدأ كتابه..

اعرف تمام..

مين اللي راح يقرأ الكلام .!!!



صدر للشاعرة

- (١) صباح الحب يا قلبي
(٢) كلام من ذهب
(٣) أحلام لا تموت
شعر عامي (٤) دموع البنفسج
(٥) الياسمين يعترف
(٦) هديل القلب
(٧) أغلى حب

تحت الطبع

عصافير الأمل للأطفال [شعر عامي]
مذكرات طبية نفسية

صدر من مطبوعات الفجر

١. تغريبة عبر زاق الهلالي دراما شعرية د. يسرى العزب
٢. الهاموش قصص حسن نور
٣. المبعدون قصص إدريس على
٤. حكايات مصرية قصص د. نجدى إبراهيم
٥. الدائرة رواية د. نجدى إبراهيم
٦. شجرة مريم شعر د. يسرى العزب
٧. تأملات فى الفن والثقافة نقد د. محمد حسن عبد الله
٨. أمسيات عائلية هادنة قصص منتصر ثابت
٩. شجر اليمون شعر خالد النشوقاتي
١٠. عصفور الحب شعر نجاه خليل
١١. حتى لا يطول الإنتظار قصص محمد نور الدين
١٢. أكتب عمرى شعر ليلى محمد على
١٣. زائر بعد منتصف الليل رواية مديحة أبو زيد
١٤. خاطئة فى الجنة رواية يحيى سليمان
١٥. النملة والحداية شعر للأطفال عزت زايد
١٦. واحد اثنين شعر للأطفال عزت زايد
١٧. المراهن رواية سيد أمين
١٨. فيكى إيه يتحب؟! شعر جلال الصبياد
١٩. فرس جامح شعر ليلى محمد على
٢٠. قمر المغارب شعر د. يسرى العزب
٢١. الدنيا جاية شعر د. فاطمة الحفنى

رقم الإيداع

٢٠٠٣ / ١٦٩٦٥

اسم المطبعة

تامركوبرس

٠١٢٤٧١٨٦٣٢ : ٥